

**Protocol dalla radunonza generala dil
CHOR SURSELVA
venderdis, ils 3 da november 2006 allas 20.00 el hotel Eden a Glion**

Tractandas:

1. Beinvegni
2. Appel ed elecziun da dus dumbravuschs
3. Protocol
4. Rapport annual dil president
5. Rapport annual dil dirigent
6. Rendaquen, rapport dils revisurs ed approbaziun dil quen annual
7. Recepziun da novas commembras e novs commembers / Demissiuns
8. Elecziuns
9. Program da cant per 2007, orientaziun ed approbaziun
10. Program per activitads dil chor sper il cant
11. Contribuziun annuala
12. Varia

1. Beinvegni

Il president Tarcisi Cavigelli fa in cordial beinvegni als presents tier la radunonza generala hodierna. El orientescha che Lucrezia Berther vegni a scriver il protocol dad oz cun quei che l' actuara Marlies Vincenz ei sin in viadi egl exteriur. La radunonza vegn tenida sco usitau per romontsch.

2. Appel ed elecziun da dus dumbravuschs

Ina gliesta d' appel sco era tala cun las adressas cursescha per s' inscriver e per aschuntar correcturas ni midadas d' adressa. Tenor quella gliesta ein 34 cantadurAs ed il dirigent Rest Tuor presents. Perstgisau per questa sera han:
Marlies Vincenz, Hugo Schär, Vreni Caprez, Fidel Lutz, Silvia Cabalzar, Lisabeth Coray, Giuliana Gienal, Pia Blumenthal, David Giger, Duri Foppa.
Sco dumbravuschs vegnan Michel Maissen e Manuel Lombris proponi ed elegi.

3. Protocol

Il protocol dalla radunonza generala 2005 ei vegnius publicaus sin nossa pagina d' internet, aschia ch' ins ha saviu prender investa leu dad el. Ei dat neginas menziuns tier quei protocol. El vegn approbaus unanimamein.

4. Rapport annual dil president

Nies president Tarcisi selegra d' astgar presentar als presents il curriu e passau durant igl onn da cant 2006. El resumescha ils puncts principals e las occurrenzas sco suonda:

- 5 gadas concert da Nadal PAX IN TERRIS, ensemen cul Cerchel musical Surselva
- embellir la fiasta da s. Barla tier l' Alptransit a Sedrun
- lotto usitau a Glion
- viseta tier P. Clau a Turitg
- participaziun alla fiasta da cant cantunala a Cuera ensemen culs chors mischedai da Laax e Sumvitg/Cumpadials
- representaziun a caschun dalla sera dalla sessiun a Mustér
- occurrenzas finalas dalla sessiun a Laax

L' occurrenza a Triel previda ha bu giu liug muort munconza da cantadurAs e muort la schliatt' aura. Medemamein ei la scolaziun da vusch previda buca vegnida menada atras.

Tut en tut haveien nus giu in stregn onn da cant, ei seigi curriu e passau bia. Ils exerchezis seigien buca stai frequentai bein igl onn vargau. Ins sappi era ch' ils chors seigien en in stan da midadas, aschia seigi quei era il cass tiel Chor Surselva. La suprastonza e la cumissiun da musica seigien sefatschentai cun quella problematica e fatg patratgs en caussa. Ei stoppi dar midadas. En tgei direcziun quell'as vegnien ad ir, vegni a semussar. Tarcisi spera d' anflar ina buna sligiazion pil Chor Surselva. Engraziont per l' atenziun siara il president siu rapport. La radunonza engrazia cun in cauld applaus.

5. Rapport annual dil dirigent

Nies dirigent Rest manegia, mirond ellas retschas dils presents da questa sera, che nus seigien "voll el trend": las retschas seslargan! Cantar seigi in dils pli bials passatemp che fetschi bein a tgierp ed olma e hagi en sesez mo aspects positivs. Perquei s' engaschi el era talmein per il cant. Mintga occurrenza seigi per el in eveniment special. Igl onn vargau seigi il Chor Surselva sepresentaus cun concerts d' ault niveau. La finamira suenter la "Missa omnium sanctorum" seigi stada da far in program empau pli lev. Tuttina hagi il program da Nadal cul Cerchel musical Surselva pretendiu bia engaschi e stentas. Rest ei satisfatgs dalla prestaziun. Nus hagian denton contonschii ina limita ensiviar, el futur sappi ins far pass pli pigns. Las ovras seigien stadas attractivas, quei seigi era vegniu concediu digl auditori cun compliments. Era neu dil Cerchel musical Surselva hagi il chor survegniu compliments.

La fiasta da cant cantunala a Cuera descriva Rest sco la pli biala alla qualla el hagi priu part tochen dacheu. Nus havein astgau embellir il survetsch divin e survegniu in grond laud ed engraziament dils dus plevons per nies cant. Las canzuns da pag seigien era gartegiadas, nus havein schizun giu standing ovations! Era sche certas cantaduras e cantadurs hagian manegiau ch' ei drovi buca els (ei hagi gie tonta glied) ha Rest tuttina giu tschaffen dalla producziun a Cuera.

La messa tier P. Clau a Turitg seigi stada biala e festiva, nus hagian passentau in bi di da cumpignia.

Las producziuns a Mustér ed a Laax (sessiun) seigien stadas in' emperneivla caussa, era sche cantar en ina tenda seigi plitost in stuer. Las registraziuns dil radio demuossien denton, che nosa producziun seigi gartegiada nuota schi mal.

Era per ovras pli semplas drovi ei igl engaschi e la responsablada dad in e scadin.

Quella responsablada da mintga singul maunca tenor Rest empau. El giavischass che mintginA sefatschentass pli seriusamein cun las ovras, da surpender dapli responsablada per sesez el senn dad equilibrar certs deficits. Ei drovi igl engaschi e la lavur persunala da mintginA.

Sin l' offerta per la scolaziun dalla vusch di Rest ch' el hagi giu pauc resun. El ei cunscients ch' in tal engaschi supplementar pretendi idealissem e tuts seigien engaschai en lavur e publicitad. Il temps a disposiziun vegni pli rars, ei vegni pretendiu adina dapli. Igl engaschi voluntari pari buca pli dad esser populars.

Aschilunsch il rapport annual da nies dirigent, il qual el terminescha cun engraziar a mintgin per siu engaschi. Tarcisi engrazia al Rest per siu rapport e sia gronda lavur duront igl onn vargau. La radunonza engrazia cun applaus.

6. Rendaquen, rapport dils revisurs ed approbaziun dil quen annual

La cassiera Barbara De Giorgi presenta il quen annual 2006 e delucidescha detagliadamein las differentas posiziuns. Barbara sa rapportar dad entradas da CHF 32'247.00, dad expensas da CHF 20'618.50 e dad in gudogn da CHF 11'630.50. La facultad dil chor: CHF 60'709.90.

Claudine Cavegn rapporta da vart dils revisurs, ils quals han constatau ch' il quen ei menaus exemplaricamein, aschia ch' els proponan dad approbar il quen 2006 e da dar scarica alla cassiera ed alla suprastonza. Quei succeda unanimamein.

Tarcisi engrazia alla cassiera Barbara ed als revisurs Michel Maissen e Claudine Cavegn per lur lavur.

7. **Recezpziun da novas commembras e novs commembers / Demissiuns**

Il president Tarcisi ha da communicar relativ biaras extradadas da commembras e commembers dil chor, ils quals han demissiunau a scret: Gion Balzer Casanova, Vreni Caprez, Ida Darms, Cecilia Cadruvi, Fidel Lutz, Renata Cathomas, Claire Gabriel, Silvia Cabalzar, Petra Spescha, Ervin Gienal e Giuliana Gienal. Las numerusas extradadas dattan da patertgar, denton eisi da mirar positivamein el futur e da far il pusseivel ord la situaziun.

Legreivlamein astgein beneventar treis novas fatschas en nossas retschas: Torino Maissen, Manuela Deplazes e Leci Deplazes.

Secapesch appellescha Tarcisi ad in e scadin dad animar personas, che vessan plascher da cantar cun nus, dad entrar el chor.

8. **Eleziuns**

David Giger vegn reelegius cun acclamaziun sco commember dalla suprastonza e dalla cumissiun da musica per ulteriurs dus onns.

Barbara De Giorgi ei vegnida elegida sco cassiera igl onn vargau per ina perioda d' uffeci da dus onns, aschia ha ella da vegnir reelegida pér l' auter onn.

Il revisur Michel Maissen ei medemamein vegniu elegius igl onn vargau, sia reelecziun croda sin l' auter onn.

Claudine Cavegn vegn reelegida sco revisura per dus ulteriurs onns.

Tarcisi Cavigelli vegn reelegius cun acclamaziun per dus ulteriurs onns sco president. El ei prompts da s' engaschar aunc dus onns, era sche la barca ballontscha in t'éc gest ussa. El spera che las undas secalmien e sefida digl engaschi dad in e scadin el futur.

Marlies Vincenz ha demissiunau sco actura e Giusep Blumenthal sco assessur.

President Tarcisi engrazia ad els per lur gronda lavur e lur engaschi nunstunclenteivel pil chor e surdat ad els in schenghetg (Barbara surdat tal pli tard a Marlies, ch' ei absenta oz). Per Marlies e Giusep dat ei dad eleger dus novs commembers en suprastonza. Ei dat neginas propostas neu dalla suprastonza ed aunc meins neu dalla radunonza. Negin dils presents vul sedeclarar prompts da surprender in post en suprastonza. Il president ei dil meini da buca sfurzar zatgi, in engaschi dueigi succeder da libra voluntad. Lavur e plascher sebrattien en suprastonza. Barbara dad d' entellir ch' ei drovi tschun personas en suprastonza, mo treis commembers seigi buca cuntenteivel, demai che mintgin hagi lu aunc dapli lavur che tochen dacheu. Ella fussi buca prompta da continuar cun la lavur en suprastonza, sch' il diember dils commembers sereducess sin treis. Tarcisi damonda ils presents, sch' in ni l' auter drovi temps da ponderaziun? Ins sappi bu co ei mondi vinavon cul chor, principalmein perquei ch' ei ha pil mument fetg paucs umens. La suprastonza e la cumissiun da musica vegnien a stuer sedar giu cul futur dil chor. Ei seigi grev da dir, vid tgei ch' ei maunchi (suprastonza, chor, dirigent, temps, motivs persunals eav.). Sch' igl avegnir dil chor schai a cor a zatgi, s' annunzia quel ni quella forza per in engaschi en suprastonza, aschia spera Tarcisi. Pil mument dat ei pia buca propostas per ils dus posts vacants en suprastonza. L' atmosfera ei duront quella tractanda empau letargica.

La cumissiun da musica secumpona da las suandontas personas: Rest Tuor, Hugo Schär, Ursula Kobler e David Giger.

Cunquei che Vreni Caprez ei extrada dil chor, ein in post ella cumissiun da musica sco era quel da vicedirigentA vacants, demai ch' il president ha buca giu success sin la tscherca d' inA successurA. Tarcisi engrazia alla Vreni per siu grond engaschi el chor e pil chor duront varga vegn onns.
Mirar sut varia.

9. Program da cant per 2007, orientaziun ed approbaziun

La suprastonza ha tractau quella fatschenta l' jamna vargada e propona suandont program pigl onn proxim da cant:

- 100 onns aurax 2007: il project "Forza Surselva" ei vegnius presentaus al chor da Mariano Tschuor a caschun dall' emprova dils 24 settember. La suprastonza ei dil meini ch' il chor dueigi sustener quei project e far part da quel, era perquei che l' aurax hagi adina puspei susteniu il chor finanziamein. Las emprovas dil Chor Surselva vegnan ad haver liug a Glion. Neu dil chor mischedau da Laax fan ca. 16, neu dil chor mischedau Sumvitg/Cumpadials ca. 12 personas part da quei project. En omisdus chors fa il project "Forza Surselva" part dil program da cant 2007.

Proceder oz:

- A) votaziun da principi sur dalla partecipaziun dil Chor Surselva al project "Forza Surselva", gie ni na (stat il chor davos il project?)
- B) personas che vulan far part dil project empleinan ora il cedel d' annunzia preparaus persuenter.

L' aurax enquera aunc ulteriurAs cantadurAs, las quallas san prender part dallas emprovas a Glion.

Rest orientescha ch' el hagi surpriu il post da menader musical dil project mo sut la cundiziun ch' ils treis chors prendien part. Ei drovi in grond chor. Il plan d' emprova seigi enconuschents per Laax e Sumvitg e per las emprovas a Schischiu. Las emprovas seigien ligiontas per tuts e tuttas commembrAs dil Chor Surselva cunquei ch' ei dat l' opziun da separticipar alla fiasta da cant districtuala 2007 a Domat cun ovras ord il project "Forza Surselva". Il temps principal ed intensiv vegni ad esser naven digl avrel/matg 2007. L' intensidad dallas emprovas stetti ella rama usitada.

Cun 28 vuschs persuenter e neginas encunter (6 abstenziuns) sedecida il Chor Surselva da far part dil project "Forza Surselva".

- La fiasta da cant districtuala 2007 ha liug ils 2 e 3 da zercladur 2007 a Domat. La suprastonza ei dil meini da prender part da quella fiasta. Eventualmein vegness cantau canzuns ord il project "Forza Surselva".

Cun 27 vuschs persuenter e neginas encunter (7abstenziuns) vegn decidiu da prender part dalla fiasta da cant districtuala 2007 a Domat.

- Sur Alfred Cavelti dalla pleiv catolica da Glion ha dumandau il Chor Surselva da cantar messa ina gada a Glion. En damonda vegness ina dumengia il schaner ni fevrer 2007. Cunquei ch' il chor fa las emprovas en las localitads dalla pleiv, fuss quei survetsch in pign segn d' engraziament e renconuschientscha.

Cun 31 vuschs persuenter e neginas encunter (3 abstenziuns) vegn dau suatientscha al gavisch da sur Alfred.

- Finizium digl onn da cant 2007 cun la fin dil project "Forza Surselva".

Ei dat neginas ulteriuras propostas pil program da cant 2007.

L'emprema emprova ha liug dumengia, ils 26 da november 2006, allas 19.30 a Glion. Silsunter suondan emprovas pér naven dils 27 da schaner 2007.

10. Program per activitads dil chor sper il cant

- Lotto: nies lotto ha in bien num tier ils giugadurs, perquei ei la suprastonza dil meini da continuar cun quell' occurrenza, era sche nosa facultad pretenda buca exnum entradas supplementaras pil mument. Sep Blumenthal less buca pli surpender la responsabladat pil lotto, ei denton prompts da segidar cun inA successurA. Tarcisi engrazia al Sep per siu engaschi sco responsabel dil lotto. Manuel Lombris sedeclara prompts da surpender la responsabladat pil lotto. Termin: 24 da fevrer 2007.
- Viadi: tenor il president lubessan las finanzas dil chor da far in viadi da dus dis. 24 dils presents sustegnan quell' idea.
- L' idea dad ir a scursalar ed a tscheina vegn ord la radunonza ed anfla era bien resun, la pli part dils presents sustegn quell' idea.

La suprastonza fa ponderaziuns pertuccont in viadi da dus dis e/ni scursalada e presenta propostas a caschun dall' emprova dils 26 da november 2006. Autras ideas per activitads ein adina beinvegnidas.

11. Contribuziun annuala

La radunonza sustegn unanimamein la proposta dalla suprastonza, da schar la contribuziun annuala sin CHF 100.00 sco tochen dacheu.

12. Varia

- Durent igl onn da cant vargau veva la suprastonza fatg la damonda, schebein il Chor Surselva dueigi far las emprovas vinavon la dumengia ni da niev il venderdis. Ils resultats demuossan, che las dunnas ein pil pli per la dumengia, ils umens ein en diember ulivau per la dumengia ed il venderdis (sin tgi eisi da mirar?!), la damonda ei vegnida alla suprastonza per far las emprovas la mesjamna (meinis a scret questa sera) e ch' il chor survegness differents commembers sche las emprovas fussen il venderdis.
- La suprastonza vegn a stuer discussiunar sur dil futur dil Chor Surselva (mira tractanda 8). Ei seigi buca sempel da tener ensemen in' uniun dalla grondezia dil Chor Surselva. La glieud vegli buca pli esser dependenta ina da l' outra. La damonda essenziala seigi sch' ei vegni continuau sco tochen dacheu ni sco chor da project. Da patertgar detti il fatg ch' ei seigi grev d' anflar umens pil chor.
- Cunquei che Fidel Lutz ei extraus dil chor drova ei pil futur zatgi che tgira nosa pagina d' internet.
- Responsabels per la cadeina da telefon per 2007: sopran: Regina Caminada, alt: Johanna Cahenzli, tenor: Sep Blumenthal, bass: Tarcisi Cavigelli.
- Tarcisi prelegia ina brev d' engraziament dall' uniun Pro Sessiun Flims/Surselva ed ina tala dalla vischnaunca da Laax per nies engaschi alla fiasta finala a Laax.
- Ursula Kobler e Tarcisi Cavigelli prendan part dalla dieta da cant dil district da cant Surselva dils 11 da november 2006 a Glion.
- Torino Maissen damonda, sch' ins savessi entscheiver cun las emprovas gia allas 19.00 enstagl pér allas 19.30. Sunter ina discussiun propona il president da votar

sur da quella damonda sil pli tard il schaner 2007. Tochen lu entscheivan las emprovas allas 19.30.

- Pertuccont novs cantadurs e program da cant pil futur informescha Rest, ch' el hagi el senn da prender el program per 2007/2008 in' ovra classica (p. ex. Haydn).
- Resultats pertuccont emprovas la mesjamna: 13 gie e 19 na.
- Participaziun al project "Forza Surselva": 23 gie, 11 na.
- La radunonza survegn aunc empau tensiun e veta, cun quei che Claudine Cavegn sedeclara prompta da surprender per in onn il post d' actuara en suprastonza. Cun grond applaus vegn engraziad ad ella persuerter. Flurin Tuor vegn animaus dall' iniziativa da Claudine e sedeclara prompts da surprender il post d' assessur en suprastonza, quei era per in onn. Era al Flurin vegn engraziad cun applaus. Roland Vincenz fa attents ch' il post da revisur da Claudine vegni libers e sedeclara gest prompts da surprender quel. Era al Roland grond engraziament. Ussa ei la suprastonza tuttina cumpleta, quei ei legreivel!
- Il protocol da questa radunonza vegn publicaus sin la pagina d' internet. Niev plaid clav: "tenor".

Cun in grond engraziament als consuprastonts Sep, Barbara, David e Marlies per lur grond engaschi, in engraziad fetg al dirigent, als vicedirigents, alla cumissiun da musica, allas cantaduras ed als cantadurs siara il president la radunonza generala hodierna.

Fin dalla radunonza: allas 23.00

Per il protocol:

Lucrezia Berther

Glion, ils 12 da november 2006